

## 博罗杨氏族谱玉成

族谱重修源流长，宗亲欢聚耀祖堂。  
昔日先祖别离苦，拓土创业勇开疆。  
祖辈荣光传千古，家族渊源孕华章。  
五湖四海寻根脉，华夏神州聚一堂。  
重修族谱启新篇，枝繁叶茂后裔强。  
家族昌盛铭青史，世代传颂功名扬。  
丹青祖谱千秋旺，亲情永恒岁月长。  
弘农四知代代传，福泽绵延万世昌。

厚公裔孙一百零三世 江西兴国圣树顿首拜撰

公元二零二五年乙巳岁春月

## 同治二年癸亥应甲公陈坑三径纪

按谱宗旺公讳柳始移长乐县散坑锡坑坪岭等处居住至元公分居陈坑寨祖祠尚在及邦显公住下寨又以祖堂作支祠生忠信厚三公予于道光八年戊子随标叔鼎叔崇兄回梓朝祖细查信公支下并无一人居此厚公亦然惟忠公子孙柏光永兴等与上寨族门秀承秀林等作主指示坟莹田亩屋宇随择日竖信公坟碑各墓各祠均已祭醮独春高叔所佃之田七十年租谷未完退耕另批并各佃户驳换赁约屋地基批与柏光兄并园土池塘在内起造每年交租钱壹百文帮完粮餉立借字一纸外收归李仁皆兄弟代买祭田文契一纸当立附托约二纸一附陈坑忠公子孙并上寨族门柏光永兴秀承秀林收租谷三担每岁清明日除谷一担作祭扫存谷二担一附锡坪李岁彩公子孙秀深兰标长运千士收租谷六石四斗每年八月初一日除谷三石作祭扫存谷三石四斗其二姓存留之谷日后回梓收作用费有本无利陈坑事毕就此下博罗县三径墟数日始到但三径之事祖上无人道论不惟其详不可得而闻即路途亦不得而知焉至三径墟访得南门洞职员杨大程之子监生兆崑及亚罗大海永珍亚盲等询其祖代不知来历问及族谱称嘉庆壬戌年被陈姓地匪骚扰文契各约放火焚烧得一敬祖请神书方知翰叙公子孙次日自办牲醴同诣白石岭祭扫张妙仙祖母坟碑确据岭下即板桥铺大坪一支坟莹甚多翰儒公葬此惜无碑志玉石不分回转至芒头窝挂张祖妣亦幸有碑坟后上即三巡寨脑可盛公葬此四处无坟只见茅

山内有一小堆系艮山坤向与谱上山向相同至将罗围挖深成一大堆祭醮而归临行时取花钱一元交崑手授伊祠内生利每年将利钱买香烛代扫墓但祖上移徙博罗县疑是翰儒公兄弟携母张氏至此及毓芳公兄弟携母邱曾二妣复回陈坑所以张祖妣儒公夫妇可盛公均葬博罗县任春公来浏只带邱曾二祖妣毓芳公夫妇骸骨葬浏阳日后房户有孝子慈孙此二处勿畏千里之遥跋涉之苦十年一回有何不可此纪

可盛公六世孙

应甲公著

公元二零二五年乙巳仲春

刊

## 宋淳熙戊申广文富公撰序

当因趋庭之暇佩学礼之训而有于礼之言曰万物本夫天人本乎祖人之兴物莫非天之所生古之圣贤所谓物以天言人以祖言何也盖天者物之天而祖者又人之天物不本乎天则自形自色于宇宙之间者孰爲之总摄人不本乎祖则以嗣以续于世代之远者孰爲之根本日月之照临风雨之鼓润而根荄茅甲得以遂其生者此物之所以同乎一天也开之于前垂之于后而高曾云初有以久其远者此人之所以同夫一祖也是则人之有祖即物之有天也 藉祖宗之泽而无报本之心是忘其祖即所以忘其天也人而忘夫天尚何容于覆载之间哉噫是祖也乃人之所由本也然有所生之本又有所利之本兴之于前傳之于后至于生生而不穷者此所生之本也置乎田园贍以基业至于利利而不竭者此所利之本也凡厥有生孰不同有所生之本哉夫既有所生复有所利是则人皆一本而我则二本矣今石族享祖宗分授之田荷祖宗蒸尝之利者得非所谓本乎祖之中而复有产业之本哉且闾巷小民乡落农夫无立锥可资而人心天理未尝不犹存拳拳于春秋祭祀之日吁彼不忘所生之本也而念祖之诚且若是殷也已承祖宗积累之本又有祖宗产业以爲凭借之本俾昌俾炽得所本于立业肇迹之余而不饥不寒又得本于仰事俯畜之际而报本之心宜何如哉我杨氏始自宏农分出于虢邑徙于吉州迁于兴国上世祖宗坟莹山川间阻不得扫挂惟唐始祖朝议大夫云岫公官粤寓梅遂立家焉生三子长思孝次思恭三思聪分爲三房

厥后弈叶相承又分爲六房而始祖則六房共之然三房所輪之蒸嘗則有西洋陸担陸斗酒米之田六房所輪之蒸嘗則有鄭均灘頭一千余畝之稅以西洋爲蒸嘗所祀者百祖罔五龍罔此則三年一收而吾之三房各有與焉鄭均灘頭爲蒸嘗所祀者灘頭合葬之曾祖參軍公黃氏夫人也此則六年一收而六房各與其一焉使后之孝子順孫念祖宗肇造之報難無負前人責望之美意收其租稅祀其墳塋食其蒸嘗追其忌諱由長及幼已終復始難萬世不能變也夫何子孫弗念厥紹任己私意壞昔良規爲一時便急計利之謀而不思祖宗貽厥孫謀之道以陸担余米爲大寡每年諸房所收僅獲升斗之利故蒸嘗之典因所得之鮮而不舉固可責也若鄭均灘頭一千余畝之稅爲大多陸房糾集則其勢不得以祀親今則吾族之衆昭穆尊卑莫不皆有一定之序矣自今已往務宜各協親愛之情明宗族之義收其租稅祀其墳塋毋得以大凌小以尊欺卑患難則相恤緩急則相通味百世不迂之言而服膺乎蘇公族譜之訓使孝弟之風藹然如春風和氣之可掬豈不美欤

十三世孫恩進士文富謹記

公元二零二五年乙巳仲春

刊

## 明永乐丁酉晋江令宗信公撰序

尝谓参天之木必有其根怀山之水必有其源人之有祖亦犹是焉昔吾族之居梅也由宋迄今世济其美称着姓焉宋末族繁星散东西幸赖我祖参军公至高祖如穆公曾祖斌孙公祖清轩公伯父树斋省斋震斋祖兴房房子系日加繁衍旧业亦颇增益而耕自足者是皆祖宗余庆之所暨也岂敢忘其所自哉吁天运一气以育万物故生生而不穷人原一祖以分九族故绳绳而永久何今之人族谱不修蒸尝不举或遗其宗绪者多矣士生百世之下欲推其所来而亲睦其宗族概不悉由不过自养自育而族之孝弟雍睦名分亲疏之类茫然不知嗟哉鸟俯而啄兽走而娱犹且徘徊群尚恐外物之害可以人而不如禽兽乎是以慨然以祖宗亲族爲念上自高曾以下类编成图贻我后裔以寓羹墙之思焉俾吾后之若子若孙序亲疏别长幼披斯图按斯记究高曾以上之远亲知根乎一气极祖父以来之远族知本乎一源使奉先之心油然而生则孝弟雍睦忠厚惻怛之念庶几由此而兴矣斯则信所切望也谨言以为记